

**Alle Jahre wieder:** Well mir bei de Scouten nött nom Kalennerjoer, mais nom Scoutsjoer fueren, dat sëch um Schouljoer orientéiert, a well mein Apercu z'Joert op der Generalversammlung mat der Sommervakanz 2007 cloturéiert hat, wëll ëch Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2007/2008.

## D'Scouts-Joer 2007/2008 bei de Scouten St. Martin Duelem

- Mëttwochs den 12ten September 2007, fir eis ongewinnt fréih, haten sech **d'Cheffen vum Grupp en éischten RV** ginn, fir déi nei Saison viirzebereeden. D'Gratisflyer'en vum Verband fir eisen Schnupperdag den 29te September louchen bereet, an duerfir mussten mir beizeiten um Dill sinn fir deen Datum nött ze verschlofen.
- Duerfir sinn eis Avex a Pio'en fir den **18ten September** op eng **éischt Versammlung** invitéiert ginn, fir och mat hinnen, en temps utile, déi nei Pläng ëmzesetzen.
- Mëttwochs den 19ten September war eng kleng Delegatioun vun eiser Chefféquipe an der Stadt beim **Kongress vun den LGS**.
- Samsdes den 22ten September war dun och d'**Rentrée** vun eisen Biber a Wëllefcher.
- Sonndes den 23ten September 2007 haten 10 Cheffen vun eisem Grupp de Wee op Klierf fonnt, fir do um **Cheffdag 2007 vun den LGS** d'Konsignen vun eisem Verband fir déi nei Saison ze kréien.
- Samsdes den 29ten September 2007 hate mir also eisen **Schnupperdag 2007**. Bal 1600 Flyer'en waren verdeelt gin, vill flott Spiller an Aktivitéiten, dorënner eisen éischten Camp-karussell stoungen bereet. Mais bei miesem sabbelegen Wieder, waren wéineg nei Kanner an Elteren op der Wiss ze gesinn. Ganzer 4 neier Nimm haaten mir um Enn op eiser Lëscht.
- Am Grupperot vum 2ten Oktober konnt de Steve dem Marc Kaufmann déi **éischt Biberchef-Ernennung** an eisem Grupp iwerreechen.
- Freides de 5ten Oktober haten och eis **Raro hir Rentrée**. Elo war d'Scoutssaison 2007/2008 définitif lancéiert.
- Samsdegs de 6ten Oktober huet d'Rad vun der Zeit alt nees ufgang ze dréien. Bei der **Montée vun de Biber bei d'Wëllef** sinn eng Rëtsch vun eise gudde Biber weidergereecht gin a sie goufen vun hiren neien Frënn an enger flotter Montéesfeier begréisst.
- Sondes de 7ten Oktober hun mir eis mat eise Farwen zahlreich un de Feierlechkeeten zum **nationale Kommémoratiounsdag an der Gemeng Duelem** bedeelegt.
- Samsdes den 13ten Oktober 2007 war mëttes beim Home an op der Wiss eng weider lass. 7 bewährten Wëllefcher sollten hir **Montée bei d'Avex** maachen. Fir déi Aufgab ze packen, hun sie fir d'éischt müssen allerhand komesch Saachen bei den Duelemer Leit zesammenhamstere goen fir doraus den Zaubertrank ze mëschen deen schon den Obelix sou stark gemacht hat.
- Dënschdes den 23ten Oktober hun d'Explorer an hirer Versammlung **Viez gekeltert**, an op déi Manéier dem Hierscht eng vun de gudde Saiten ofgewonn.
- Den 8ten November waren eis **Carapio** um groussen Tour. Mat hirem Film zur Feier vun de 50 Joer traité de Rome haten sie jo am Juli den 3te Plaatz gemaacht an engem Concours deen d'Chamber ausgeschriwwen hat. Elo sollten sie och hire **Prais** kréien, an zwar waren sie all mat ministérieller Permissioun an der Schoul freigestallt, fir zu Bréissel, ënnert der Leedung vum Europadeputéierten Claude Turmes, **d'EU** Institutiounen besichen ze goen.
- Vum 17ten op den 18ten November waren eis **RaRo** um Tour fir d'Montéessessioun 2007 ze beschléissen. Zu **Colmarbiery** haten sie sech anquartéiert, fir no beim Grand-Duc dem Tom Steichen sein beschwéierlechen Wee an de Gnadenstand vun de RARO ze zelebrieren.

- Samsdes den 1ten Dezember 2007 haten sech d'Wellef an d'Avex RV am Home gin. Et huet gudd no Dannennolen gericht well et goug drëms 100 **Adventskränztz** färdeg ze maachen an bei d'Leit ze bréngen. Dank der wonnerbarer Viirarbecht vun eise gudde Geeschter aus der Amicale, war dat keen Probleem, an och d'Pio'en haten déi bestallten Adventskalenner beizeiten färdeg.
- Sondes den 2ten Dezember 2007 haten sech och dëss Kéier eng Partie Cheffen aus eisem Grupp afonnt, fir bei der **Porte ouverte vum Buttek Mosaik** zu Fëlschdreff matzehëlfen, an mat dem Groperekichelchersstand hiren Deel zum Geléngen vun dëser flotter Aktioun vu konkreter an gelieferter Nächsteléift beizedroen.
- Dënschdes den 11ten Dezember hun eis Pionniéer mam Steve **d'Krëppchen an der Duelemer Kiirch** opgebaut. Krëschtdag konnt sou lues kommen.
- Vun Freides dem 14ten Dezember owends bis Sondes dem 16ten Dezember war de Marc Kaufmann aus eisem Grupp, mat enger Reih Scouten vu Réimech an mat den Responsablen vun der Equipe Animation Religieuse vum Verband mam Bus op **Wien** gefuer fir vun do **d'Friddenslicht vu Betlehem** fir Lëtzebuerg matzebréngen.
- Méindes de 17ten Dezember waren eng Partie vun eis mam Christophe Machtelinckx beméit, d'Generalprouf fir d'Friddenslichtveillé den nächsten Dag gudd iwert d'Bühn ze kréien. Et ass schon gudd, datt eise Christophe sou gudd Nerven huet, well bei all deenen Pleiten Pech und Pannen mat der Technik huet hien déi gebraucht.
- Dënschdes owends den 18ten Dezember 2007 sinn mir mat enger grousser Delegatioun op Réimech gefuer, fir déi **regional Friddenslichtfeier 2007** do matzeerliwien. D'Veillé déi mir mat de Réimecher Scouten zesummen op d'Been gestallt haten, ass ganz gudd ukomm wéi eng Reih Kommentären hanneno gewisen hun. An och de Kortège bei d'Kannerheem an déi uschlëssend Feier mat 500 Kärzen war ganz beandrockend.
- Op **Helleg Owend** hun mir eis zu enger gudder Partie Avex an Pionniéer getraff, fir dem Friddenslicht vu Betlehem senger gerecht ze gin. Flott war, dass mir souvill Gruppen wéi nach nie konnte maachen, an esou ganz ville Mënschen e klengen Schein vun der richteger Krëschtdagsfreed konnten schenken. Wéi all Joers hun frouh Gesiichter an sou muenesch Freedentréin eis gewisen, datt eise Wee nëtt emsoss war.
- Bei der anschliessender **Familljemass zu Duelem** hu mir nach a Form vu Fürbitten matgeschafft, an zum Schluss krut all Mënsch deen dat wollt, d'Flaam vu Betlehem geschenkt, an enger klenger Glaskrëppchen, déi eis Wëllefcher gebastelt haten.
- Vun Donnegdes dem 3ten bis Samsdes den 5te Januar 2008 haten sech d'AVEx Rendez-vous zu Miersch gin, fir am Chalet vun der FNEL hiren **Wantercamp „ Top drop an der Wiichtelcheslee“** ze erliwien. Teaterviirbereedung, Nuetsmarsch, eng Uuchtveillé, en taktescht Dagesspill duerch d'Mamerléen, Karaoke, e Plangspill an eng Rolltssession an der Mierscher Schwämm hun dësen Camp zu engem volle Succès gi gelooss. A fir d'Raclette Freides Owends haten mir och nach Besuch vum Nadine, vum Steve, vum Lis a vun e puer Pionniéer kritt.
- Dënschdes den 22 Januar 2008 haten mir d'Gemengenautoritéiten, eis Kanner an hir Elteren an all eis Frënn op **d'Generalversammlung vum Grupp St. Martin 2008** invitéiert. Mat dësem alljährechen Exercice wollten mir fir déi néideg Transparenz an de Geschécker vun eisem Verein suergen. Bei deser Geleegenheet hun déi versammelt Leit dem Martin Welter seng Propose fir eisen neien Maskottchen ungeholt. Dat klengt Schoof mam Scoutshutt huet elo jhust nach en Numm musse kréien.
- Mëttwochs den 20te Februar war e schwéieren Dag. Den **Här Emil Vogt**, dem Elisabeth an dem Alex, eise Frënn hire Papp war an der Vakanz gestuerwen a gouf op dësem Dag zu Duelem **begruewen**. Mat enger grousser Delegatioun hu mir dëse gudde Mënsch, deen bis iwert sein Doud eraus vill Guddes fir eis gemacht hat, op sengem läschte Wee begleet. Mir wärten sein Udenken ëmmer an Eieren halen.
- Déi ganz Woch war eng absolut hektesch, sollten mir dach Samsdes den 23ten Februar Teater spillen. No enger ganzer Reih u Problemer a Pannen mat der Bühn konnte mir den 21te Februar eng éischte Kéier op déi dun eréischt ganz färdeger Bühn prouwen goen. Wann een also bedenkt, dass mir am ganzen, Generalprouf inclus, nëmmen 2 mol ënnert Realbedingungen prouwen konnten, dann stellt een sech d'Fro ob dat nëtt beim Opstellen vum Manifestatiounskalenner vun der Gemeng besser ze regelen wier..

- Eisen **Teater selwer**, war nees en Megaevent bei deem mir, an eisem Stéck SOS-SIEKHCAK, nett manner wéi 62 Scouten oprieden geloosst hun (ouni d'Cheffen matzezielen, déi hannert de Kulissen an an der Technik gewuddert hun).
- Den 8te März hun d'Wëllef hir Versammlung genotzt, fir sech déi grouss **Expo „ Scoutsland „** am Musée vun der Staat Lëtzebuerg unzekucken an esou ze erliewen zou wéi enger grousser Scoutsfamill sie gehéieren.
- Op Gréngendonnegdeg dem 20te März 2008 owends hat de Carlo sech mat enger Reih Avex RV gin zu Trenténg an der Kiirch fir **d'Operatioun Getsemani 2008**. No der Feier vun der Stéftung vun der Eucharistie hun sie sech zu Duelem am Home eremfonnt fir bei enger Partie „ Spiel des Lebens“, Veillée an Taizée.meditatioun, dem Geheimnis vun dëser Nuecht méih no ze kommen. Den nächsten Dag hun sie genotzt fir nieft Kreitzwee a klengen Meditatiounen dem Grupp eng BA ze maachen. Sie hun den Home d'Alentouren an de Garage entrümpelt a gebotzt.
- Grouss Hektik stung virun der Diir. Well zesummen mat allen Aktiven aus dem Grupp an der Amicale wollte mir de **15te Gebuertsdag vum Grupp hellege Mäerten Duelem** würdeg feiern. Duerfir haten mir eis d'Hütten an d'Infrastruktur vun der Naturerkundungsstation Teufelsschlucht zu Ernzen déi Sait vun Iechternach gelount. Vum 28te März bis den 1ten Abrëll 2008 hun sech all eis Branchen do mat engem eegenen Program erëmfonnt. Samsdegs den 29te März war de groussen Dag vun eiser gemeinsamer Gebuertsdaysfeier. Mat Footballtournéier, enger Retrospektive, enger Danksagungsmass an der Yurte an engem bonte Käptensdinner mat 5 Gang-Menu an eegener Animatioun hun mir mat villen Frënn zesummen deen memorablen Daag würdeg gefeiert. Dobei huet dunn eist neit Maskottchen „ **den Père-Woll**“ och endlech sein Numm kritt.
- Samsdegs den 12ten Abrëll hun sech eng Reih Explorer a Pionnéier owends am Home zesummenfonnt. Mat enger gemeinsamer Raclette, an enger Veillée hun sie de Fong geluecht fir den **Pélé des jeunes 2008** ze bestoen. Déi meescht hun bei Singstar d'Nuecht duerch gemacht, an sou sinn mir muerges géint 2:00 Auer zu Duelem lassgang. Eng kläng Stärkung zu Hesper huet eis gehollef och de Räscht vum Wee ze packen. Ganz flott war, dat mir souviell Vertrauen an eneen haten, am Uelzechtdall eng Reih Gesätzer vum Rousekranz hart zesummen ze bidden. No der Pélésmass huet e gudde Kaffi um Märtchen d'Liewensgeschter nees geweckt.
- Donnegdes de 24ten Abrëll waren och eis Wëllef bei d'Muttergottes komm. Sie haten sech an der Stadt RV gin fir **d'Wëllefsoktavandacht**.
- Dënschdes den 29ten Abrëll huet definitiv eis **Scoutskirmes 2008** hire Schiet op eis geworf. D'Zelter goufen opgeriicht bei heftege Schauerer. An vun Freides dem 2te Mee un war e fleisseg Völlekchen op der Wiss am gang ze wudderer. Onmengen vun Virbereedungen an Installatiounen waren ze maachen. Mais déi bewährten Equipe vun Amicale a Cheffen hat bis owends de ganze Buttek stoen, a bei guddem Wieder konnt dunn owends eis traditionnel Play-backshow iwert d'Bühn goen. Och den nächsten Dag huet vun eisem Grupp vill Asatz gefrot, an Dank viller klenger a grousser Hänn war eist Fest dest Joer nees e grousse Succès. Jhust de Schlecki, eis Kouh konnt sech net fir een Feld entscheiden an huet dun eben op 4 Felder zesummen gesch..... An de Gewënn vum Seelzéihturnéier ass dëst Joer och zu Duelem bei eise Pompjé'en bliwwen.
- Vum 12ten op den 13te Mee waren e puer Avex an de Ben Seil mam Lisi a mam Carlo fir e spezielle RV ënnerwee. Méindes mëttes haten sie dem Geocache an der Teufelsschlucht zu Ernzen de Krich ugekënnegt. Mais trotz aller Ustrengung ass et hinnen och dess Kéier nees nëtt gegléckt deen Cage ze fannen. Déck frustréiert wollten sie sech zu Berdorf an d'Huellay annisten goen. Mais och dat sollt hinnen nëtt vergonnt sinn. Hei haten sech international Filmproduzenten breet gemacht, déi bis 2 Auer nuets an der Höhl gefilmt hun. Sie sin hongreg an irritéiert op Ernzen zeréckgefuer, wou sie an der Grillhütte en Ënnerdag fir d'Nuecht fonnt hun. No kuerzer Nuecht si sie ungetrueden, fir moies fréih zu Fouss op Iechternach ze goen, an do ëm 8:00 bei der Bëschofsmass fir d'Pilger dobei zesinn. Duerno hun sie bei der Sauer gechillt éih sie fir 11:00 op eng Rëtsch vun eise Frënn mat hiren Instrumenter gestouss sin. Zesummen mat hinnen a villen aneren Scouten a Leit ( iwer 13.000 Sprénger) hun sie **d'Sprangprozessiou zu Iechternach 2008** materlieft. No enger Grillpartie an engem Match Minigolf zu Berdorf, si sie schlieslech doudmidd awer zefriddend doheem gelandt.

- Samsdes a Sondes de 17+ 18te Mee 2008 waren mir mat eiser Chefféquipe schons nees um Dill. 2 mol haten mir um Keltenhaus e SchaffWE, elo sollt et ageweit gin. Dat ganz a Verbindung mat engem ganze KeltenWE ( **Bealtaine** ), bei deem mir Duelemer Scouten eng Kees an e Gedrénsstand bedriwwen hun.
- Sondes den 1te Juni huet eng kleng Delegatioun vun eisem Grupp mat dem Fändel un der Prozesssioun deelgeholt, déi zu Fëlschdreff gangen ass als Ouverture fir **d'Poorverbandesfest 2008**.
- Sondes de 15te Juni sinn eis Wëllef fréi muerges op Beggen gestart fir den nationalen **Wëllchesrally** matzerliwwen.. Mat villen aneren Scouten waren sie do op d'Sich no de Wiichtelcher gang déi fréier do gelieft sollen hun.
- Freides den 20te Juni 2008 huet sech eis Chefféquipe RV ginn fir en ganz neien a freedegen Moment. Als 1ten vun eisen Memberen deen all Etappen ( ausser Wëllefcher) matgemacht huet, an deen vun Ufank un zu eisem Grupp gehéiert, ass den **Tim Seil** deen Nomëtteg zu Haassel op der Gemeng **bestued** gin. Kloer, dass mir him hun missen de Réck steipen an him an dem Claire op Scoutsmanéier eis bäschte Wësch iwerbruecht hun..
- An de räschtlechen Wochen vum Schouljoer huet een eis Scouten an de Versammlungen gesinn, d'Material (Holz, Zelter , Kichenmaterial a Këschten) an d'Reih bréngen. D'Summercamp'en stungen vrun der Diir.
- Kaum war d'Vakanz do, goug et lass:
- Samsdes den 12te Juli hun eis Biber als Ersatz fir de Summercamp fir deen hir Cheffen keng Zeit haten, en Ausflug op Betebuerg an de Märchenpark gemacht. Wann een de Gesiichter op de Foto'en no urdeelt, haten d'Kanner vill Freed dobei.
- Vum 18te Juli bis den 31te Juli 2008 waren eis Carapio mat de Scouten aus 29 lëtzebuurger a 4 portugiesesche Gruppen op den **nationalen CarapioCamp „ Let'z X port“ zu Idanha-a-Nova am Portugal**. Méih wéi 1900 km vun Duelem ewech hu sie, a batterer Hëtzt, e flotte Camp erlieft, och wann de Ravi nëtt ëmmer deem entsparch huet, waat mir vum Steve hier gewinnt sinn. Mais sie hun awer e ganz flott Land vun no kennengeléiert an eenzel Leit haten och kierperlechen Kontakt mat der portugiesescher Déierenwelt. A waat de Ravi betrëfft, do sinn mir Duelemer Scouten Meeschter am improviséieren, sou datt sie no 2 Wochen midd awer zefridden nees op Lëtzebuerg zeréckkomm sinn.
- Vum 18ten op den 26te Juli sinn d'Avex mam Velo op Lenningen gefuer, fir do um „ **Top drop, Avex on Top**“ hiren Summercamp matten an der Natur ze erliwwen. E ganz variéierten Programm deen awer ëmmer Top drop war huet sie op en Hike geféiert wou sie am Keltenhaus iwernuecht hun, d' Baggerweieren hun si mam Velo eruewert, Fësch hun sie mat selwerggebauten Angelen gefang, Atelierien, Sport an Chillardag a ganz vill méih huet sie bestänneg an Otem gehalten. An Owends huet den Scoutsdag mat enger Editioun vun der daily Kasparsoap opgehalten.
- Vum 23ten bis de 26te Juli sinn dunn och eis Wëllef fir de Summercamp ausgeschwärrmt. Hire Wee huet sie dëst Joer op Woltz an de Chalet Ranch-Moot geféiert, wou sie ënnert dem Thema „ **an de Crocs vum Mr Crusoe**“ e flotten an ofwiesslungsreiche Summercamp erlieft hun.
- An last, but not least sinn dun och nach eis ganz grouss, **d'RaRo** op hiren Summercamp gang. Mam Velo sinn sie vum 27 te Juli bis den 1ten August op Férange an d'Lorraine gefuer. Hei huet eisen alen Gruppecheff de Jean Langehegermann e flotten Terrain mat Chalet a grouse Weieren an dat matten an de Konstruktiounen vun der franséischer Maginotligne aus dem Krich. En Idealen Terrain fir spannend a Scoutsméisseg Aventuren. Hike, Paintball, Besuchsdag waren nemmen e puer Héichpunkten op hirem Camp. Dobei hun sie eng grouss BA fir eisen ale Frënd de Jang gemacht. E ganzen Daag laang hun eis RaRo den Terrain geméiht , de Weier vun Kraut an Lëtchen befreit an e groussen an zolitte Bootssteeg an de Weier gebaut.
- Awer och no dësem chargéierte Programm huet sech eis RaRo-Chefféquipe nett gin. Vum 30ten August bis de 6 te September waren de Christophe Machtelinckx an de Christopher Schuh um Naeihaisgen um **Gilwellcamp 2008** dobei. Villeicht ass dat jo den Usatz, fir de läschte Manko vun eisem Grupp nach ze beseitegen. Eise Grupp huet a senger kurzer Existens ganz villes erreecht, mais et ass nach keen Cheff mat Woodbadge aus eise Reien erviirgang. Wéi seet de Fransous: „ il y a du pain sur la planche“. Villeicht hun mir nom Cheffdag 2009 eppes ze feieren. Deemno Affaire à suivre.

- Niewt dësen Aktivitéiten gehéieren weider opgezielt: Ëm déi 120 Versammlungen mat eise Scouten (all 5 Branchen zesammen), 4 Grupperéit, an eng ganz Rëtsch Präparatiounstreffen vun de Cheffen.